

Dunya Lahi Nuvuu Lonyisia Va

Magona Yepei

A jifa kiliyei na ke numu vuu kpelee ti maa hewulei lo towa kpaupau le laha va, tonya kee ndileli duniyihu.

A jifa ngawuleehu kee baagbuala nuvugaa ti lonyisia ma ti wanga a pie hindangaa na hii i wotea a nemahugili waa nuvu ma, dunya ninahu mia mahoingoo muvu i gu i yepe kia ngi longola, kee ngi lanaye kee ngi lima hinda.

A jifa maa ii houni nu mu vuu i wote a ko gomo mahaya nyamu nyamu kee nduwoo ya yeya, ke mahoingoo sawei i nuvu lonyii mavale,

A jifa mahoingoo ndiamoyei na ndolesialuahhu i leguloma,

A jifa nungei nasia ti ndolei kpele ti woyilei na hu ti lanaya genga kolo yayilingoihu,

Kee nuvu lonya, ngi nuvu ya, ngi yeyei kee hindui taa nyahii ti lonyei maahewu lei, kee gboma ti ti lia yilinga ko yange yange kee ndevu yekpe la i le guloma.

A jifa ndolei nasia ti dunyi hu ti lahei wumbua a ngoyila koo ti to ke baago ma a yelo na nuvu va kee ngi lonya ya va,

A jifa kiliyei yaa numu kpelehu hinda yayilingoi ji a lelo guloma,

Fale naa

Komewai na ta toli a

Genela Asembili

Ndenga Ye

Dunya Lahei ji nuvu lonyinsia va i wote a gaiki numui kpelee kee ndolei kpelee va nahii ke numu gbi oo ngoyila hugbate gbi na hinda yayilingoi ji ngi enmahu kpoto i lapi kpugu kpugu a numu gaalahu wie i to ke bagooma iye tonei jisia ma kee hugbemboi jisia nungei nasia weti yei ndoo kpele hugbatai ji hu, kee nasia ti ndolongaa hu nahi tii yee ndolo kpele hugbatei jisia bu.

#### 1. Ngayilii Ye Ngilei

Numuvuisia Kpelee ta ti le te ye nduwoo ya hu, tao ti nuvu yei kee ti lonyi maa hewungo. Kiiya kee hindaluuho goola a yelo ti hun. Fale mahoungo ti ti nyonyochu hoi kia ndeegaa.

#### 2. Ngayilii Ye Fele Yei

Hugbatei ji numu kpelee lo va, nu genyei, ngi luwu yegii, nyaha oo hindgo, nu layia, Ngewoi na a feli, ngi gilii yei, ngi le gi kee ngi gbate ii ma.

Tao maa ii houni nduahhu ge i waa nungaa luahu jifa tii gbuani ndolo yilahu, oo jifa tia heini ti yekpe va oo tii yekpe va.

#### 3. Ngayilii Ye Sawa Yei

Nuvu gbi ngi lonya mia koo ndevu i ye ngi hu, koo aa ye nuu bu, tao koo mahungbee i ye ngi ma.

#### 4. Ngayilii Ye Naani Yei

Maa ii houni ti numu gbi hou nduwoya hu, oo ti ngi waa monemone hinda hu, maa ii houni nuu maajia va nduwoya hu, tao gboma mahoungo nduwoyei ye keyi kgbi lekee i gboyo.

#### 5. Ngayilii Ye Loolu Yei

Maa ii houni koo ti kpaagba hinda la nuu gbi ma, tao koo ti hinda wee a numu na a ke ke nuvu yaa a ngie.

#### 6. Ngayilii Ye Weita Yei

Nuvu gbi lee ngi lonya mia koo sawei i baagoo ngi nuvu ya ma mia leke gbi.

#### 7. Ngayilii Ye Wofila Yei

Nuvu kpelee ti maahewungoo sawei gulo, tao mahoungo sawei i ti mahu wee nahi gbi ee ti hu woyo. Mahoungo sawei i to ke hugbatei ji ee numugbi gbukpuu.

#### 8 Ngayilii Ye Wayakpei

Nuu gbi ngi lonya mia koo sawa kpaambu ngaa yekpe ti ngi lonyei mavale a watii na ngi lonyi nasia ndoo jawei

keni numu a nyani ngi ma.

#### 9. Ngayilii Ye Taalui

Maa ii houni ti numu magba, ti ngi wu kpegbema do ti ngi gbe ngi yee a baama hu we.

#### 10. Ngayilii Ye Puui

Nuu gbi ngi lonya mia nahii ti la nyongaa ngi ma te i ngi maahinda gulanga kolehu do i sawa kpoukpou nyaninga, koo ti ye njie na le fofohu, tao koo sawakpambu jein jein gongaa ti loo ngi va.

#### 11. Ngayilii Ye Puu Mahuyelei

Nuu gbi ngi lonya mia nahi ti la nyongaa ngi ma hinda ngamu va, taa kiti lewe haani ti ye njie na le fofohu, tao ti jia a sawe panda pandaa.

Maa ii houni ti baa nuu gbi ma a sawahu wee – ndoo yila jawa yo do ndunya kpelee jawa. Tao gboma maa i houni sawei i kpagbaa la nuu ma na kaahu lewengo sawei na ma i nyanini.

#### 12. Ngayilii Ye Puu Mahufilei

Maa ii houni nuu i ye na nahi ta loko wili ngi bundu hinda hu, ngi ye peebu hinda, kolei kee ngowili na a pili ngitiwoma kia lee ti longola, kee kakpama a baagbuama hu we. Maa houno sawei i nuu gbi maawee yee kakpamei ji bondayeya.

#### 13. Ngayilii Ye Puumahu Sawei

Mahoungo numu gbi i ye hugbembo hu koo i li mia leke gbi ngi longo i li na, tao koo i hei ndoo gbi leke hu ngi longo i heihu.

Nuu gbi ngi lonya mia koo i gbua ndolo yila hu i li peka hu, i wee a ngi yee do mbaa tinda, tao koo i yama ngi ndei na hu mia i gbuanina.

#### 14. Ngayilii Ye Puumahu Naanii

Nuu gbi lonya mia koo i ngi yaama lowu kakpama yeye ndoo yeka hu, tao koo i nganei gbuana.

Ye sawei ji ee lekpe gbi naleke ye numui ji i ndolo jawa nyanini, tao i hinda gbulanina na ndolo woyila hugbatei i loila.

#### 15. Ngayilii Ye Puumahu Lolli

Nuu gbi lonya mia koo i wote a ndololi.

Maa i houni koo ti nuu gbi baa a ngi lolli ya, do koo ti ngi baa a ndololi ya ndoo yekahu.

#### 16. Ngayilii Ye Puumahu Weitei

Hindui taa nyahii na ti lakpango ta soowelo ti ndengaa le, ti genye ii yeni bee yila, tii yeni bee a ndolo yila hunblaa, do Ngewo veli gbambi yila ma. Ti lonye maahewungo soova, soohu, do ji ta lo ti gole.

Koo hindui taa nyaha ti soowee, a nee pein ti veinja we.

Bondei mia ndolei yei kpokui le, fale maahoungo heimii ke ndolo gbi ti bondei mahu gbee kpotu kpotu.

#### 17. Ngayilii Ye Puumahu Woilei

Nuu gbi lonya mia koo i ngi wuma haakangaa majoo, tao gboma koo taa nungaa ti makpoma haaka majoo.

Te nuu gbi haaka gbua ngi yeya kia leke ti longola.

#### 18. Ngayilii Ye Puumahu Waykpei

Nuu gbi lonya mia koo i kiiya wee, koo i giila gboo tonyei le do gboo i lonyani, Ngewo ye gboo ngi longo i feli, ye tonye ji a ngi jein jein lo koo i ngi giliyei do ngi yewoveilei wote, I wote bee atayakpe do taa nungaa, fofohu do sokuma, koo i nungaa gaa a ngi ngliyei kee ngi yewo hindei.

#### 19. Ngayilii Ye Puumahu Taalui

Nuu gbi lonya mia koo i kiliya wee tao koo i yee kiiyeina le fofohu, yee tonyei ji a peelo yee kiiyei ji nuu gbi ee gbekpa kuloo, tao koo i nemahulee kee ngowii majoo tao koo ta bee i fe nungaa we a pele gbi hu we, nahi bandowoma gbi ee waa nduahu.

#### 20. Ngayilii Ye Nugboyongoi

Nuu gbi lonya mia koo taa nungaa ti gome, tao koo taa teini ti lee, i na lee hinda huwu va ii le.

Tee nguaa numu gbi la a kpoli hale koo i wote a kome ma mo.

#### 21. Ngayilii Ye Nugboyong-Mahuyelei

Nuu gbi lonya mia koo ngi loko i ye ngi guameti hindeihu, ke bee ta vulii i yehu oo nungaa tia vulii ta lokoloo ti ma.

Nuu gbi lonya mia koo ngi loohu guameti hugbate wie ngoisia ti hiti ngi ma kia lee ta hiti nungaa ye pekeisia ma.

Nungaa mia maahoungo ti ti guameti hei, ti gbayei mia a pie a yenge, hulembinga ta yamalo ti kolei gula, tao ye kolei ji a kgula bunduhulo, nahii nungbi ee gbekpa numu gulo.

#### 22. Ngayilii Ye Nugboyong-Mahufelei

Numu gbi lee ndololii a ngie, ngi lolei kpoma hugbate wie ngi va, tao koo ngi lolei taa ngitiwoma hugbate ti pee ye kpoma hugbatei na i foo ngi ma, tao a majoolo kialeke ngi lolei gbatei kee ye saweisia ti na, gboma kia lekee ye numui bee ngi hami gii na, koo wei i legulo.

#### 23. Ngayilii Ye Nugboyong-Mahusawei

Numu gbi lonya mia koo i yenge, tao koo i ngengei na wie ngi longola, koo i mbelehei majoo ngengemei, tao koo ti to kengengei ee ngi lo.

Numu gbi lonya mia, nahii nduahu gbiima, koo ti ngi pawa kia a yenge la.

Ngenge mogbi lonya mia koo ti ngi pawa nahii ta kee ngi mablaa ta ti magbee gbualo hu kia nuvu, tao gboma koo kpoma yeka i yena ngi va.

Ngenge mogbi lonya mia koo i wili hugbatehu na ngenga blaa ma vale.

#### 24. Ngayilii Ye Nugboyong-Mahunaani

Ngenge mogbi lonya mia koo i levu tao koo i kpele yeka gbua, tao gboma koo aa ngenge huguango waa wie, mahoungo gboma i yaa a ndevu wati majoo, nahi i yaa ye ndevui na wie ma ta yaalo a ngi pawa.

#### 25. Ngayilii Ye Nugboyong-Mahuloolui

Numu gbi lonya mia koo ta kee ngi mablaa ti ye kaahugbua hu, ti mehee yekpe me, ti kula yekpe yili, ti la ndama yekpe, ti hale yekpe majoo, tao gboma guameti i ye na ti va, hugbate yekpe i yena ngi va a watii na ee ye ngege hu, a watii na ngi heigengo, watii na ngi wovang, kee watii na hinda a wa ngi mahu nahii ee gumbu.

Mahoungo gboma hugbate i ye na kuimeisia kee ndengaa va. Mahoungo ndengaa kpelee, naa ti ke taa ti njeni ti soohu oo tii soohu, ye hugbatei ji i ti maa wee.

#### 26. Ngayilii Ye Nugboyong-Mahuweitei

Numu gbi lonya mia koo i kolo gaa. Maa ii houni navoo hinda i ye kologaala ma, ke bee i wote a ye totomei. Mahoungo kolo gaalei i wote a sawa kpawu kpawu na ndo gbi e gbuama ye tootomi. Nyandengo koo ngenge kolongaa i yna kpoto, kee kolo yalngo gaalei naa va ti nemabu lewengo.

Kolo gaalei i wote a hinda na a nuu le guloma, ngi lonyisia kee ngi hugbemboi. I loko hei hinda yawubu goola, hinda bu houla kee ndiamoya dunyei kpelee luahu, kenyeisia kee Ngewo veli gbambisia luahu, tao kpaya waalo ndolo kpele woyila yenge lukuisia hu koo ndileli i li guloma.

Bondeisia ti wote a haala bla ta ke na kaa ye gboo ti leingaa ta pee.

#### 27. Ngayilii Ye Nugboyong Mahuwofilei

Numu gbi lonya mia koo ngi loko i ye mia a yena ye kondi hinda hu, i ngaa nee ye ye mbembe hu kee sayensi ye tekulomii taa ye nafei.

Numu gbi lonya mia koo mahugbee kpotu kpotu i ye ngi gbate hani ma, i ye a ngole oo hani lalangoo oo sayensi haaka.

#### 28. Ngayilii Ye Nugboyong Mahuwayakpei

Numu gbi lonya mia koo ngi yee jawa kee ngitiwoma gee i yena, na a to ke dunya lahei jisias ta hitilonga.

#### 29. Ngayilii Ye Nugboyong Mahutaawui

Numu gbi lee, mia i heina, tao a lena guloma, mahouingo i na hinda hou a loko veinja.

Ji numu a ye ngi lonyei kee ngi hugbemboi ya yenge ma, na lee a wote a kpeengu a wee a saweilo naa a nuu wekeisia ti lonyei kee ti hugbemboi ma vale, kee numu kpele ti maahinda va ngoyila loohu.

Numu e ye tonyei jisias kee hugbemboi jisias yayenge nahi kpuango pilei na ma, tao gboma ee pinde kaa na wooma

na ndolo kpele gomei ti ndani.

### 30. Ngayilii Ye Numugboyongo Mahupuui

Gbewogbe gbi na kolei ii hu na nu mu a nde ye kenga ti puilo na koo i ndolo oo ngoyila hugbate laenga ti lonyei kee ti hugbemboi mahugbua.